

四庫全書

集部

欽定四庫全書

李太白文集卷二十二

唐李白撰

歌詩五十三首

詠物

聽蜀僧濬彈琴

蜀中

蜀僧抱綠綺西下峨眉峰為我一揮手如聽萬壑松客
心洗流水餘響入霜鍾不覺碧山暮秋雲暗幾重

魯東門觀刈蒲 魯中

魯國寒事早初霜刈渚蒲揮鋤若轉月拂水生連珠此
草最可珍何必貴龍鬚織作玉牀席欣承清夜娛羅衣
能再拂不畏素塵燕

詠鄰女東牕海石榴

魯女東牕下海榴世所稀珊瑚映渌水未足比光輝清
香隨風發落日好鳥歸願為東南枝低舉拂羅衣無由
一攀折引領望金扉

南軒松

南軒有孤松柯葉自緜
冪清風無閑時蕭灑終日夕陰
生古苔綠色染秋煙碧何當凌雲霄直上數千尺

詠山樽二首

前一首一作詠柳
少府山瘿木樽

蟠木不凋飾且將斤斧踈樽成
山岳勢材是棟梁餘外與金罍
並中涵玉醴虛慚君垂拂拭遂
忝玳筵居

擁腫寒山木嵌空成酒樽
愧無江海量偃蹇在君門

初出金門尋王侍御不遇詠壁上鸚鵡

一作勅
放歸山

留別陸侍御
不遇詠鸚鵡

落羽辭金殿，孤鳴託繡衣。
能言終見棄，遂向隴西飛。

紫藤樹

紫藤挂雲木，花蔓宜陽春。
密葉隱歌鳥，香風留美人。

觀放白鷹二首

八月邊風高，胡鷹白錦毛。
孤飛一片雪，百里見秋毫。

寒冬十二月，蒼鷹八九毛。
寄言燕雀莫相啐，自有雲霄

萬里高。

觀博平王志安少府山水粉圖

粉壁為空天丹青狀江海游雲不知歸日見白鷗在博
平真人王志安沈吟至此願挂冠松溪石磴帶秋色愁
客思歸生曉寒

題雍丘崔明府丹竈

美人為政本忘機服藥求仙事不違葉縣已泥丹竈畢
瀛州當伴赤松歸先師有訣神將助大聖無心火自飛
九轉但能生羽翼雙鳧忽去定何依

觀元丹丘坐巫山屏風

昔遊三峽見巫山見畫巫山宛相似疑是天邊十二峰
飛入君家綵屏裡寒松蕭颯如有聲陽臺微茫如有情
錦衾瑤席何寂寂楚王神女徒盈盈高咫尺如千里翠
屏丹崖粲如綺蒼蒼遠樹圓荆門歷歷行舟汎巴水水
石潺湲萬壑分烟光草色俱氤氛溪花笑日何年發江
客聽猿幾歲聞使人對此心緬邈疑入高丘夢綵雲

求崔山人百丈崖瀑布圖

百丈素崖裂四山丹壁開龍潭中噴射晝夜生風雷但
見瀑泉落如深雲漢來聞君寫真圖島嶼備縈迴石黛
刷幽草曾青澤古苔幽緘儻相傳何必向天台

見野草中有名白頭翁者

醉入田家去行歌荒野中如何青草裡亦有白頭翁折
取對明鏡宛將衰鬢同微芳似相誚流恨向東風

流夜郎題葵葉

慙君能衛足歎我遠移根白日如分照還歸守故園

瑩禪師房觀山海圖

真僧閉精宇滅跡含達觀列嶂圖雲山攢峰入霄漢丹
崖森在目清晝疑卷幔蓬壺來軒牕瀛海入几案烟濤
爭噴薄島嶼相凌亂征帆飄空中瀑水灑天半崢嶸若
可陟想像徒盈歎杳與真心冥遂諧靜者翫如登赤城
裏揭涉滄洲畔即事能娛人從茲得蕭散

白鷺鷥

白鷺下秋水孤飛如墜霜心閑且未去獨立沙洲傍

詠桂二首

園花笑芳年池草豔春色猶不如槿花
媚娟玉階側芬
榮何天促零落在瞬息豈若瓊樹枝
終歲長翕絕

世人種桃李多在金張門攀折爭捷徑
及此春風暄一
朝天霜下榮耀難久存安知南山桂
綠葉垂芳根清陰
亦可託何惜樹君園

白胡桃

紅羅袖裏分明見白玉盤中看却無疑
是老僧休念誦

腕前推下水精珠

巫山枕障

巫山枕障畫高丘
白帝城邊樹色秋
朝雲夜入無行處
巴水橫天更不流

庭前晚開花

西王母桃種我家
三千陽春始一花
結實苦遲為人笑
攀折唧唧長咨嗟

宣城長史弟昭贈余琴溪中雙舞鶴詩以見志

令弟佐宣城贈余琴溪鶴謂言天涯雪忽向牕前落白
玉為毛衣黃金不肯博當風振六翮對舞臨山閣顧我
如有情長鳴似相託何當駕此物與爾騰寥廓

題詠

題隨州紫陽先生壁

神農好長生風俗久已成復聞紫陽客早署丹臺名喘
息飡妙氣步虛吟真聲道與古仙合心將元化并樓疑
出蓬海鶴似飛玉京松雪牕外曉池水階下明忽耽笙

歌樂頓失軒冕情終願惠金液提攜凌太清

題元丹丘山居

故人栖東山自愛丘壑美青春卧空林白日猶不起松
風清襟袖石潭洗心耳羨君無紛喧高枕碧霞裡

題元丹丘潁陽山居

并序

丹丘家于潁陽新卜別業其地北倚馬嶺連峰嵩丘
南瞻鹿臺極目汝海雲巖映鬱有佳致焉白從之遊
故有此作

仙遊渡潁水訪隱同元君忽遺蒼生望獨與洪崖羣卜
地初晦跡興言且成文却顧北山斷前瞻南嶺分遙通
汝海月不隔嵩丘雲之子合逸趣而我欽清芬舉跡倚
松石談笑迷朝曛終願狎青鳥拂衣棲江濱

題瓜洲新河餞族叔舍人賁

齊公鑿新河萬古流不絕豐功利生人天地同朽滅兩
橋對雙閣芳樹有行列愛此如甘棠誰云敢攀折吳關
倚此固天險自茲設海水落斗門潮平見沙汰我行送

季父弭棹徒流悅楊花滿江來疑是龍山雪惜此林下
興愴為山陽別瞻望清路塵歸來空寂蔑

洗脚亭

白道向姑孰洪亭臨道旁前有吳時井下有五丈牀樵
女洗素足行人歇金裝西望白鳥洲蘆花似朝霜送君
此時去回首淚成行

勞勞亭

天下傷心處勞勞送客亭春風知別苦不遣柳條青

題金陵王處士水亭

此亭蓋齊朝南苑
又是陸機故宅

王子耽玄言，賢豪多在門。
好鵝尋道士，愛竹嘯名園。
樹

色老

一作秀

荒苑池光蕩，華軒此堂見。
明月更憶陸平原

掃地青玉簟，為余置金樽。
醉罷

一作後

欲歸去，花枝宿鳥

喧何時復來此再

一作更

得洗器煩

題嵩山逸人元丹丘山居

并序

白久在廬，霍元公近遊。
嵩山故交深，情出處無間。
崑

信頻及許為主人，欣然適會本意。
當冀長往不返，欲

便舉家就之兼書共遊因有此贈

家本紫雲山道風未淪落况懷丹丘志冲賞歸寂寞
竭來遊閩荒捫涉窮禹鑿夤緣汎潮海偃蹇陟廬霍憑雷
躡天牕弄景憩霞閣且欣登眺美頗愜隱淪諾三山曠
幽期四岳聊所託故人契嵩頴高義炳丹腹滅跡遺紛
囂終言本峰壑自矜林湍好不羨市朝樂偶與真意并
頓覺世情薄爾能折芳桂吾亦採蘭若拙妻好乘鸞嬌
女愛飛鶴提攜訪神仙從此鍊金藥

題江夏修靜寺

此寺是李北海舊宅

我家北海宅作寺南江濱空庭無玉樹高殿坐幽人書

帶留青草琴堂

一作臺

累素塵平生種桃李寂滅不成春

改九子山為九華山聯句

并序

青陽縣南有九子山山高數千丈上有九峰如蓮華

按圖徵名無所依據太史公南遊略而不書事絕古
老之口復闕名賢之紀雖靈仙往復而賦詠罕聞予
乃削其舊號加以九華之目時訪道江漢憩於夏侯

迴之堂開蒼岸幘坐眺松雪因與二三子聯句傳之

將來

妙有分二氣靈山開九華

李白

層標遏遲日半壁明朝霞

高積雪曜陰壑飛流歆陽崖

韋權興
權作瓊

青熒玉樹色縹緲

羽人家

李白

題宛谿館

吾憐宛谿好百尺照心明

一作久照
心益明

何謝新安水千尋

見底清白沙留月色綠竹助秋聲却笑巖湍上于今獨

擅名

題東谿公幽居

杜陵賢人清且廉
東谿卜築歲將淹
宅近青山同謝朓
門垂碧柳似陶潛
好鳥迎春歌後院
飛花送酒舞前簷
客到但知留一醉
盤中祇有水精鹽

雜詠

嘲魯儒

魯叟談五經
白髮死章句
問以經濟策
茫如墜烟霧
足

著遠遊履首戴方頭巾緩步從直道未行先起塵秦家
丞相府不重褒衣人君非叔孫通與我本殊倫時事且
未達歸耕汶水濱

懼讒

二桃殺三士詎假劒如霜衆女妬蛾眉雙花競春芳魏
姝信鄭袖掩袂對懷王一惑巧言子朱顏成死一作傷
行將泣團扇戚戚愁人腸

觀獵

太守耀清威，乘閑弄晚輝。
江沙橫獵騎，山火繞行圍。
箭逐雲鴻落，鷹隨月兔飛。
不知白日暮，歡賞夜方歸。

觀胡人吹笛

胡人吹玉笛，一半是秦聲。
十月吳山曉，梅花落敬亭。
愁聞出塞曲，淚滿逐臣纓。
却望長安道，空懷戀主情。

軍行

騮馬新跨

一作誇

白玉鞍，戰罷沙場月色寒。
城頭鐵鼓聲

猶震匣裡金刀血未乾。

從軍行

百戰沙場碎鐵衣
城南已合數重圍
突營射殺呼延將
獨領殘兵千騎歸

平虜將軍妻

平虜將軍婦入門
二十年君心自不悅
妾寵豈能專出
解牀前帳行吟道
上篇古人不唾井
莫忘昔纏絲

春夜洛城聞笛

誰家玉笛暗飛聲
散入春風滿洛城
此夜曲中聞折柳

何人不起故園情

嵩山採菖蒲者

神人多古貞雙耳下垂肩嵩岳逢漢武疑是九疑仙我
來採菖蒲服食可延年言終忽不見滅影入雲烟喻帝
竟莫悟終歸茂陵田

金陵聽韓侍御吹笛

韓公吹玉笛個儻流英音風吹繞鍾山萬壑皆龍吟王
子停鳳管師裏掩瑤琴餘響渡江去天涯安可尋

流夜郎聞酺不預

北闕聖人歌太康南冠君子竄遐荒漢酺聞奏鈞天樂
願得風吹到夜郎

放後遇恩不霑

天作雲與雷霈然德澤開東風日本至白雉越裳來獨
棄長沙國三年未許回何時入宣室更問洛陽才

宣城見杜鵑花

蜀國曾聞子規鳥宣城還見杜鵑花一叫一迴腸一斷

三春三月憶三巴

白田馬上聞鶯

黃鸝啄紫椹五月鳴桑枝我行不記日誤作陽春時
蠶老客未歸白田已縑絲

一作吳人欲委絲

驅馬又前去捫心空

自悲

一作
嗟

暖酒

熱暖將來賓鐵文暫時不動聚白雲撥却白雲見青天
撥頭裏許便乘仙

三五七言

秋風清秋月明落葉聚還散
寒鳥栖復驚相思相見知
何日此時此夜難為情

雜詩

白日與明月晝夜尚

一作常

不閑况爾悠悠人安得久世

間傳聞海水上乃有蓬萊山
玉樹生綠葉靈仙每登攀
一食駐玄髮再食留紅顏
吾欲從此去去之無時還

李太白文集卷二十二

欽定四庫全書

李太白文集卷二十三

唐李白撰

歌詩六十二首

閨情

寄遠十二首

三鳥別王母銜書來見過腸斷若剪絃其如愁思何遙
知玉牕裡纖手弄雲和奏曲有深意青松交女蘿寫水

山井中同泉豈殊波秦心與楚恨皎皎為誰多

青樓何所在乃在碧雲中寶鏡挂秋水

一作月

羅衣輕春

風新粧坐落日悵望金

一作錦

屏空念此

一作剪線

送短書願

因

一作同

雙飛鴻

本作一行書殷勤道相憶一行復一行滿紙情何極瑤

臺有黃鶴為報青樓人朱顏凋落盡白髮一何新自知

未應還

一作老

離居

一作君

經三春桃李今若為當牕發光

彩莫使香風飄留與

一作取

紅芳待

玉筍落春

清一作

鏡坐愁湖陽水聞

且一作

與陰麗華風烟

接鄰里青春已復過白日忽相催但恐荷

飛一作

花晚令

人意已推相思不惜夢日夜向陽臺

遠憶巫山陽花明淥江暖躊躇未得往淚向南雲滿春

風復無情吹我夢魂斷不見眼中人天長音信短

陽臺隔楚水春草生黃河

一作陰雲隔楚水轉蓬落渭河

相思無日夜

浩蕩若流波流波向海去欲見終無因

一作定繞珠江濱

遙將

一點淚遠寄如花人

昔一作妾在春陵東君居漢江島百里望花光往來成白

道一作日日抹蘿
燕上山成白道

一為雲雨別此地生秋草秋草秋蛾

飛相思愁落暉何由一相見滅燭解羅衣

一本暉下添
昔時攜手去

今時流淚歸遙知不
得意玉筋點羅衣

憶昨東園桃李紅碧枝與君此時初別離金瓶落井無
消息令人行歎復坐思坐思行歎成楚越春風玉顏畏
銷歇碧牕紛紛下落花青樓寂寂空明月兩不見但相
思空留錦字表心素至今緘愁不忍窺

長短春草綠緣階如有情
卷蕊心獨苦抽却死還生
覩物知妾意希君種後庭
閑時當採掇念此莫相輕

魯縞如玉霜筆

一作剪

題月支書寄書白鸚鵡西海畏離

居行數雖不多字字有委曲
天未如見之閒緘淚相續
千里若眼萬里若在心
相思千萬里一書直千金

美人在時花滿堂美人去後餘空牀
牀中繡被卷不寢

一作更不卷

至今三載聞餘香

一作猶聞香

香亦竟不滅人亦竟

不來相思黃葉盡

一作落

白露濕

一作點

青苔

此首一作贈遠

愛君芙蓉嬋娟之艷色若可餐兮難再得憐君冰玉清
迴之明心情不極兮意已深朝共琅玕之綺食夜同鴛
鴦之錦衾恩情婉孌忽為別使人莫錯亂愁心亂愁心
涕如雪寒燈厭夢魂欲絕覺來相思生白髮盈盈漢水
若可越可惜凌波步羅襪美人美人兮歸去來莫作朝
雲飛陽臺

長信宮

月皎昭陽殿霜清長信宮天行乘玉輦飛鷲與君同更

有歡娛處

一作別有
留情處

承恩樂未窮誰憐團扇妾獨坐怨

秋風

長門怨二首

天回北斗挂西樓金屋無人螢火流月光欲到長門殿
別作深宮一段愁

桂殿長愁不記春黃金四屋起秋塵夜懸明鏡青天上
獨照長門宮裡人

春怨

白馬金羈遼海東羅帷繡被卧春風落月低軒窺燭盡
飛花入戶笑牀空

代贈遠

一作寄遠

妾本洛陽人狂夫幽燕客渴飲易水波猶來多感激胡
馬西北馳香鬣搖綠絲鳴鞭從此去逐北蕩邊陲昔去
有好言不言久離別燕支多美女走馬輕風雪見此不
記人恩情雲雨絕啼流玉筋盡坐恨金閨切織錦作短
書腸隨回文結相思欲有寄恐君不見察焚之揚其灰

手跡自此滅

陌上贈美人

一云小放歌行一首
在第三此是第二篇

駿馬驕行踏落花
垂鞭直拂五雲車
美人一笑蹙珠箔
遙指紅一作青樓是妾家

閨情

流水去絕國
浮雲辭故關
水或戀前浦
雲猶歸舊山
恨君流一作龍沙去
棄妾漁陽間
玉筯夜垂一作日夜流
雙雙落

朱顏黃鳥坐相悲
綠楊誰更攀
織錦心草草
挑燈淚斑斑

斑窺鏡不自識况乃狂夫還

代別情人

清水本不動桃花發岸傍桃花弄水色波蕩搖春光我
悅子容艷子傾我文章風吹綠琴去曲度紫鴛鴦昔作
一水魚今成兩枝鳥哀哀長難鳴夜夜達五曉起折相
思樹歸贈知寸心覆水不可收行雲難重尋天涯有度
鳥莫絕瑤華音

代秋情

幾日相別離門前生蘼蕪寒蟬聒梧桐日夕長鳴悲白
露濕螢火清霜零兔絲空掩紫羅袂

一作空閨
掩羅袂

長啼無

盡時

對酒

蒲萄酒金叵羅吳姬十五細馬馱青黛畫眉紅錦靴道
字不正嬌唱歌玳瑁筵中懷裡醉芙蓉帳底奈君何

怨情

新人如花雖可寵故人似玉猶來重花性飄揚不自持

玉心皎潔終不移故人昔新今尚故還見新人有故時
請看陳后黃金屋寂寂珠簾生網絲

湖邊採蓮婦

小姑織白紵未解將人語大嫂採芙蓉溪湖千萬重長
兄行不在莫使外人逢願學秋胡婦貞心比古松

怨情

美人卷珠簾深坐嚔蛾眉但見淚痕濕不知心恨誰

代寄情人楚詞體

君不來兮徒蓄怨積思而孤吟雲陽一去以遠隔巫山
淶水之沉沉留餘香兮染繡被夜欲寢兮愁人心朝馳
余馬於青樓恍若空而夷猶浮雲深兮不得語却惆悵
而懷憂使青鳥兮銜書恨獨宿兮傷離居何無情而兩
絕夢雖往而交踈橫流涕而長嗟折芳洲之瑤華送飛
鳥以極目怨夕陽之西斜願為連根同死之秋草不作
飛空之落花

學古思邊

銜悲上隴首腸斷不見君
流水若有情幽哀從此分
蒼茫愁邊色惆悵落日曛
山外接遠天天際復有雲
白雁從中來飛鳴苦難聞
足繫一書札寄言歎離羣
離羣心斷絕十見花成雪
胡地無春輝征人行不歸
相思杳如夢珠淚濕羅衣

思邊 一作春怨

去年何時君別妾南園
綠草飛蝴蝶今歲何時妾憶君
西山白雪暗秦雲玉關去此三千里
欲寄音書那可聞

口號吳王舞人半醉

風動荷花水殿香
姑蘇臺上宴吳王
西施醉舞嬌無力
笑倚東牕白玉牀

折荷有贈

涉江翫秋水愛此紅蕖鮮
攀荷弄其珠蕩漾不成圓
佳人綵雲裡欲贈隔遠天
相思無因見悵望涼風前

代美人愁鏡二首

明明金鵲鏡了了玉臺前
拂拭皎冰月光輝何清圓
紅

顏老昨日白髮多去年鈿粉坐相誤照來空淒然

美人贈此盤龍之寶鏡燭我金縷之羅衣時將紅袖拂
明月為惜普照之餘輝影中金鵲飛不滅臺下青鸞思
獨絕藁砧一別若箭弦去有日來無年狂風吹却妾心
斷玉筋併墮菱花前

贈段七娘

羅襪凌波生網塵那能得計訪情親千盃綠酒何辭醉
一面紅粧惱殺人

別內赴徵三首

王命三徵去未還
明朝離別出吳關
白玉高樓看不見
相思須上望夫山

出門妻子強牽衣
問我西行幾日歸
來時儻佩黃金印
莫見蘇秦不下機

翡翠為一作高樓金作梯
誰人獨宿倚門啼
一作卷蒸愁
坐待鳴雞

夜泣寒燈連曉月
行行淚盡楚關西

秋浦寄內

金史紀事本末卷之三十三
卷二十三
我今尋陽去辭家千里餘結荷見水宿却寄大雷書雖
不同辛苦愴離各自居我自入秋浦三年北信踈紅顏
愁落盡白髮不能除有客自梁苑手攜五色魚開魚得
錦字歸問我何如江山雖道阻意合不為殊

自代內贈

寶刀截流水無有斷絕時妾意逐君行纏綿亦如之別
來門前草春盡秋轉碧掃盡還更生萋萋滿行跡鳴鳳
始相得雄鷲雌各飛遊雲落何山一往不見歸估客發

大樓一作東海知君在秋浦梁苑空錦余陽臺夢行雨妾家

三作相失勢去西秦猶有舊歌管淒清聞四鄰曲度入
紫雲啼無眼中人女弟爭笑弄悲羞淚盈巾妾似井底
桃開花向誰笑君如天上月不肯一回照窺鏡不自識
別多憔悴深安得秦吉了為人道寸心

秋浦感主人歸鷺寄內

霜朽楚關木始知殺氣嚴寥寥金天廓婉婉綠紅潛胡
鷺別主人雙雙語前簷三飛四回顧欲去復相瞻豈不

戀華屋終然謝珠簾我不及此鳥遠行歲已淹寄書道
中歎淚下不能緘

送內尋廬山女道士李騰空二首

君尋騰空子應到碧山家水春雲母碓風掃石楠花若
戀幽居好相邀弄紫霞

多君相門女學道愛神仙素手掬青靄羅衣曳紫烟一
往屏風疊乘鸞著玉鞭

一作不
著鞭

贈內

三百六十日日日醉如泥雖為李白婦何異太常妻

在尋陽非所寄內

聞難知慟哭行啼入府中多君同蔡琰流淚請曹公知
登吳章嶺昔與死無分崎嶇行石道外折入青雲相見
若悲歎哀聲那可聞

南流夜郎寄內

夜郎天外怨離居明月樓中音信疎北雁春歸看欲盡
南來不得豫章書

越女詞五首

長干吳兒女眉目艷星月
屐上足如霜不著鴟頭襪
吳兒多白皙好為蕩舟劇
賣眼擲春心折花調行客
耶溪採蓮女見客棹歌迴
笑入荷花去佯羞不肯來
東陽素足女會稽素舸郎
相看月未墮白地斷肝腸
鏡湖水如月耶溪女如雪
新粧蕩新波光景兩奇絕

浣沙石上女

玉面耶溪女青蛾紅粉粧
一雙金齒屐兩足白如霜

示金陵子

一作金陵子詞

金陵城東誰家子

一作金陵子

竊聽琴聲碧

一作夜

牕裡落花

一片天上來隨人直渡西江水
楚歌吳語嬌不成似能
未能最有情謝公正要東山妓
攜手林泉處處行

出妓金陵子呈盧六四首

安石東山三十春
傲然攜妓出風塵
樓中見我金陵子
何似陽臺雲雨人

南國新豐酒
東山小妓歌
對君君不樂
花月奈愁何

東道烟霞主西江詩酒筵相逢不覺醉日墮歷陽川
小妓金陵歌楚聲家僮丹砂學鳳鳴我亦為君飲清酒
君心不肯向人傾

巴女詞

巴水急如箭巴船去若飛十月三千里郎行幾歲歸

哀傷

哭晁卿衡

日本晁卿辭帝都征帆一片遶蓬壺明月不歸沉碧海

白雲愁色滿蒼梧

自溧水道哭王炎三首

宣州作

白楊雙行行白馬悲路傍
晨興見曉月更似發雲陽
溧水通吳關逝川去未央
故人萬化盡閉骨茅山岡
天上隆玉棺泉中掩龍章
名飛日月上義與風雲翔
逸氣竟莫展英圖俄天傷
楚國一老人來嗟龔勝
亡有言不可道
雪泣惜蘭芳

王公希代寶棄世一何早
弔死不及哀殯宮已秋草
悲

來欲脫劍挂向何枝好哭向茅山雖未摧一生淚盡丹
陽道

王家碧瑤樹一樹忽先摧海內故人泣天涯弔鶴來未
成霖雨用先天濟川材一罷廣陵散鳴琴更不開

哭宣城善釀紀叟

紀叟黃泉裡還應釀老春夜臺無曉日沽酒與何人

一作

題戴老酒店云戴老黃泉下還應
釀大春夜臺無李白沽酒與何人

宣城哭蔣徵君華

敬亭埋玉樹知是蔣徵君果得相如草仍餘封禪文池
臺空有月詞賦舊凌雲獨挂延陵劒千秋在古墳

李太白文集卷二十三

欽定四庫全書

李太白文集卷二十四

唐 李白 撰

古賦

明堂賦 并序

大獵賦 并序

大鵬賦 并序

劔閣賦

擬恨賦

惜餘春賦

愁陽春賦

悲清秋賦

明堂賦 并序

昔在天皇告成岱宗改元乾封經始明堂年紀總章
時締構之未輯痛威靈之遐邁天后繼作中宗成之
因兆人之子來崇萬祀之丕業蓋天皇先天中宗奉
天累聖纂就鴻勳克宣臣白美頌恭惟述焉其辭曰
伊皇唐之革天創元也我高祖乃仗大順赫然雷發以
首之於是橫八荒漂九陽掃叛換開混茫景星耀而秦
階平虹蜺滅而日月張欽若太宗繼明重光廓區宇以

立極綴蒼昊之顏，網淳風，沕穆鴻恩，滂洋武義，烜赫於
有截，仁聲馭躋乎無疆。若乃高宗紹興，祐統錫羨，神休
傍臻，瑞物咸薦，元符剖兮地珍，見既應天，以順人遂，登
封而降，禪將欲考，有洛崇明堂，惟厥功之未輯兮，乘白
雲於帝鄉，天后勤勞，輔政兮中宗，以欽明克昌，遵先軌
以繼作兮，揚列聖之耿光，則使軒轅草圖，羲和練日，經
之營之不彩，不質因子來於四方，豈殫稅於萬室，乃准
水臬攢雲，樑磬玉石於隴坂，空瓌材於瀟湘，巧奪神鬼

高窮昊蒼聽天語之察察擬帝居之鏘鏘雖暫勞而永
固兮貽聖謨於我皇觀夫明堂之宏壯也則突兀曠曠
乍明乍蒙太古元氣之結空籠嵒頽昏若鬼若業似天
間地門之開闔爾乃劃峩峩以嶽立郁穹崇而鴻紛冠
百王而垂勳燭萬象而騰文宰惚恍以洞啓呼嵌崑而
傍分又比乎崑山之天柱轟九霄而垂雲於是結構乎
黃道峩堯乎紫微絡勾陳以繚垣闔闔而啓扉崢嶸
曾疑祭宇宙兮光輝崔嵬赫奕張天地之神威夫其背

泓黃河垠漱清洛太行却立通谷前廓遠則標熊耳以
作揭豁龍門以開關點翠彩於洪荒洞清陰乎羣山及
乎烟雲卷舒忽出乍沒岌嵩噴伊倚日薄月雷霆之所
鼓蕩星斗之所任托挈金龍之蟠蜿挂天珠之砒砒勢
拔五嶽形張四維軋地軸以盤根摩天倪而創規樓臺
崛岉以奔赴城闕峯岑而蔽虧珍樹翠草含華揚蕤目
瑤井之熒熒拖玉繩之離離擷華蓋以儻漭仰太微之
參差擁以禁扃橫以武庫獻房心以開鑿瞻少陽而舉

措採殷制酌夏步雜以代室重屋之名括以辰次火木
之數壯不及奢麗不及素層簷屹其霞矯廣厦鬱以雲
布掩日道遏風路陽烏轉影而翻飛大鵬橫霄而側度
近則萬木森下千宮對出熠乎光碧之堂炁乎瓊華之
室錦爛霞駁星錯波沕颯蕭寥以颼颼官陰鬱以櫛密
含佳氣之青葱吐祥烟之鬱律九室窈窕五闈聯綿飛
楹磊砢走拱夤緣雲楣立岌以橫綺綵楠攢欒而仰天
皓壁晝朗朱甍晴鮮頰欄各落偃蹇霄漢翠楹迴合蟬

聯汗漫沓蒼穹之絕垠跨皇居之太半遠而望之赫煌
煌以輝輝忽天旋而雲昏迫而察之粲炳煥以照爛條
山訛而晷換蔑蓬壺之海樓吞岱宗之日觀猛虎失道
潛虬蟠梯逕通天而直上俯長河而下低玉女攀星於
網戶金娥納月於璇題藻井綵錯以舒蓬天憲施翼而
銜霓扶標川而罔足擬跟絰而罷躋要離欵矐而外喪
精視水背而中迷亘以複道通乎掖垣全入西樓實為
崑崙前丞後疑正儀躅以出入九夷五狄順方面而來

奔其左右也則丹陛嶢嶢彤庭煌煌列寶鼎歆金光流
辟雍之滔滔像環海之湯湯闢青陽而啟總章廓明臺而
布玄堂儼以太廟處乎中央發號施令采時順方其間
闕也三十六戶七十二牖度筵列位西八東九白虎列
序而躡蹠青龍承隅而蚺蜺其深沉奧密也則赤燁掌
火招拒司金靈威制陽叶光摧陰坤斗主土據乎其心
若乃熠燿五色張皇萬殊人物禽獸竒形異模勢若飛
動瞪眙睇眙明君暗主忠臣烈夫威政興滅表賢示愚

於是王正孟月朝陽登曦天子乃施蒼玉轡蒼螭臨乎
青陽左个方御瑤瑟而彈鳴絲展乎國容輝乎皇儀傍
瞻神臺順觀雲之軌俯對清廟崇配天之規欽若盱蠻
惟清緝熙崇牙樹羽熒煌歲蕤納六服之貢受萬邦之
籍張龍旗與虹旌攢金戟與玉戚延五更進百辟奉珪
瓚獻琛帛顯昂俯儂儼容疊跡乃潔道醞修築盛奠三
犧薦五牲享于神靈太祝正辭庶官精誠鼓大武之隱
鞀張鈞天之鏗匄孤竹合奏空桑和鳴盡六變齊九成

羣神來兮降明庭蓋聖主之所以孝治天下而享祀宵
冥也然後臨辟雍宴羣后陰陽為庖造化為宰飡元氣
灑太和千里鼓舞百寮賡歌于斯之時雲油雨霈恩鴻
溶兮澤汪濊四海歸兮八荒會吮聒乎區寓駢闐乎闕
外羣臣醉德揖讓而退而聖主猶夕惕若厲懼人未安
乃目極于天耳下于泉飛聽馳明無遠不察考鬼神之
奧推陰陽之荒下明詔班舊章振窮乏散教倉毀玉沈
珠卑宮頽牆使山澤無間往來相望帝躬乎天田后親

於郊桑棄未反本人和時康建翠華兮萋萋鳴玉鑿之
缺缺遊乎昇平之圃憇乎穆清之堂天欣欣兮瑞穰穰
巡陵於鶉首之野講武於驪山之旁封岱宗兮祀后土
掩粟陸而苞陶唐遨遊乎崆峒之上汾水之陽吸沆瀣之精
英黜滋味而馨香貴理國其若夢幾華胥之故鄉於是元元
澹然不知所在若羣雲從龍衆水奔海此真所謂我大君
登明堂之政化也豈比夫秦趙吳楚爭高競奢結阿房
與叢臺建姑蘇及章華非享祀與嚴配徒掩月而凌霞

由此觀之不足稱也况瑤臺之巨麗復安可以語哉敢揚國美遂作辭曰

穹崇明堂倚天開兮龍嵒鴻濛構瓌材兮偃蹇垓莽邈崔嵬兮周流辟雍岌靈臺兮赫日星噴風雷宗祀肸鬩王化弘恢鎮八荒通九垓四門啓兮萬國來考休徵兮進賢才儼若皇居而作固窮千祀兮悠哉

大獵賦

并序

白以為賦者古詩之流辭欲壯麗義歸博遠不然何

以光贊盛美感天動神而相如子雲競誇辭賦歷代
以為文雄莫敢詆訐臣謂語其略竊或褊其用心子
虛所言楚國不過千里夢澤居其大半而齊徒吞若
八九三農及禽獸無息肩之地非諸侯禁淫迷職之
義也上林云左蒼梧右西極考其實地周袤纔經數
百長楊誇胡設網為周陸放麋鹿其中以搏攫充樂
羽獵於靈臺之囿圍經百里而開殿門當時以為窮
壯極麗迨今觀之何齷齪之甚也但王者以四海為

家萬姓為子則天下之山林禽獸豈與衆庶異之而
臣以為不能以大道匡君示物周博平文論苑之小
竊為微臣之不取也今聖朝園池遐荒殫窮六合以
孟冬十月大獵於秦亦將曜威講武掃天蕩野豈淫
荒侈靡非三驅之意耶臣白作頌折中厥美其辭曰
粵若皇唐之契天地而襲氣母兮祭五葉之歲蕤惟開
元廓海寓而運斗極兮摠六聖之光熙誕金德之淳精
兮漱玉露之華滋文章森乎七曜兮制作參乎兩儀括

衆妙而為師明無幽而不燭兮澤無遠而不施慕往昔
之三驅兮順生殺於四時若乃嚴冬慘切寒氣凜冽不
周來風玄冥掌雪木脫葉草解節土囊烟陰火井冰閉
是月也天子處乎玄堂之中飡八水兮休百工考王制
兮遵國風樂農人之閑隙兮因校獵而講戎乃使神兵
出於九闕天仗羅於四野徵水衡與林虞辨土物之衆
寡千騎飈埽萬乘雷奔梢扶桑而拂火雲兮括月窟而
搜寒門赫壯觀於今古業搖蕩於乾坤此其大略也而

內以中華為天心外以窮髮為海口豁咽喉以洞開吞
荒裔以盡取大章按步以來往夸父振策而奔走足跡
乎日月之所通囊括乎陰陽之未有君王於是撞鴻鐘
發鑿音出鳳闕開宸襟駕玉輅之飛龍歷神州之層岑
遊五柞兮瞰三危挾細柳兮過上林攢高牙以總總兮
駐華蓋之森森於是擢倚天之劔彎落月之弓崕崕叱
兮可倒宇宙噫兮增雄河漢為之却流川嶽為之生風
羽旄揚兮九天絳獵火燃兮千山紅乃名蚩尤之徒聚

長戟羅廣澤呵雨師走風伯稜威曜乎雷霆烜赫震於
蠻貊陋梁都之體制鄙靈囿之規格而南以衡霍作襟
北以岱常作袂夾東海而為塹兮拖西溟而流渠麾九
州之珍禽兮迴千羣以坐入聯八荒之奇獸兮屯萬族
而來居雲羅高張天網密布置罟繇原峭格掩路蟻蝶
過而猶礙螭螟飛而不度彼層霄與殊榛罕翔鳥與伏
兔從營合技彌巒被崗金戈森行洗晴野之寒霜虹旗
電掣卷長空之飛雪吳駢走練宛馬蹀血縈衆山之聯

繇隔遠水之明滅使五丁摧峰一夫拔木下整高顏深
平險谷擺椿枯開林叢惶惶呷呷盡奔突於場中而田
強古冶之儔烏獲中黃之黨越崢嶸獵莽蒼喑呼哮闕
風旋電往脫文豹之皮抵玄熊之掌批後手揉挾三挈
兩既徒搏以角力又揮鋒而爭先行魁號以鷲睨兮氣
赫火而敵烟拳封獬引巨狴梟羊應叱以斃踣騶貽亡
精而墜巔或碎腦以折脊或歎髓以飛涎窮遐荒蕩林
藪扼土狻殪天狗脫角犀頂探牙象口掃封狐於千里

振雄虺之九首咋騰蛇而仰吞拖奔兕以却走君王於
是我通天靡星旃奔雷車揮電鞭觀壯士之効獲顧三
軍而欣然曰夫何神挾鬼標之駭人也又命建夔鼓勵
武卒雖躡躒之已多猶拗怒而未歇集赤羽兮照日張
烏號兮滿月戎車轆轤以陸離鼓騎煌煌而奮發鷹犬
之所騰捷飛走之所蹉蹶搜磨廢之咆哮蹂豺貉以挂
格膏鋒染鍔填巖掩窟觀殊材與逸羣尚揮霍以出沒
別有白貂飛駿窮竒軀貓牙若錯劒鬣如叢竿口吞爰

鉞目極槍櫓碎琅玕攫玉弩射猛彘透奔虎金鏃一發
旁疊四五雖鑿齒磨牙而致伉誰謂南山白額之足覩
揔八校搜四隅馳專諸走都盧趨喬林撇絕壁抄衝猢
攬貊獮囚鼪鼯於峻岨頓穀矍於穹石養由發箭竒肱
飛車巧聒更贏妙兼捕且墜鷗鴟於青雲落鴻雁於紫
虛捎鶴鵠漂鷓鴣殫地廬空神居斬飛鵬於日域摧大
鳳於天墟龍伯釣其靈鼈任公獲其巨魚窮造化之譎
詭何神怪之有餘所以噴血流川飛毛灑雪狀若乎高

天雨獸上墜於大荒又似乎積禽為山下崩於林穴陽
鳥沮色於朝日陰兔喪精於明月思騰裝上獵於太清
所恨穹昊於路絕而忽也莫不海晏天空萬方來同雖
秦皇與漢武兮復何足以爭雄俄而君王茫然改容愀
然有失居安思危防險戒逸斯馳騁以狂發非至理之
弘術且夫人君以端拱為尊玄妙為寶暴殄天物是謂
不道乃命去三面之網示六合之仁已殺者甘其犯命
未傷者全其天真雖剪毛而不獻豈割鮮以淬輪解鳳

皇與鷲鷲兮旋駒虞與麒麟獲天寶於陳倉載非熊於
渭濱於是享獵徒封勞苦軒行庖騎酌醕韜兵戈火網
晷然後登九霄之臺宴八紘之圃開日月之扃闢生靈
之戶聖人作而萬物覩覽蒐教與狩歧何宣成之足數
哂穆王之荒誕歌白雲之西母曷若飽人以淡泊之味
醉時以淳和之觴鼓之以雷霆舞之以陰陽虞乎神明
狃於道德張無外以為且琢大朴以為杙頓天網以掩
之獵賢俊以御極若此之狩罔有不克使天人宴安草

木蕃植六宮斥其珠玉百姓樂於耕織寢鄭衛之聲却
靡曼之色天老掌圖風后侍側是三階砥平而皇猷允
塞豈比夫子虛上林長楊羽獵計麋鹿之多少誇苑囿
之大小哉方將延榮光於後昆軼玄風於邈古擁嘉瑞
臻元符登封於太山篆德於社首豈與乎七十二帝同
條而共貫哉君王於是迴蜺旌反鑾輿訪廣成於至道
問大隗之幽居使罔象掇玄珠於赤水天下不知其所
如也

大鵬賦 并序

余昔於江陵見天台司馬子微謂余有仙風道骨可與神遊八極之表因著大鵬遇希有鳥賦以自廣此賦已傳于世往往人間見之悔其少作未窮宏達之旨中年棄之及讀晉書覩阮宣子大鵬讚鄙心陋之遂更記憶多將舊本不同今復存于集豈敢傳諸作者庶可示之子弟而已其辭曰

南華老仙

一作仙老

發天機於漆園吐崢嶸之高論開浩蕩

之奇言徵至

一作志

怪于齊諧談北溟之有魚吾不知幾

千里其名曰鯀化成大鵬質凝胚渾脫髻鬣於海島張
羽毛於天門刷渤澥之春流晞扶桑之朝暉烜赫于宇
宙憑凌乎崑崙一鼓一舞煙濛沙昏五嶽為之震落百
川為之崩奔乃蹶厚地揭太清巨層霄突重溟激三千
以崛起向九萬而迅征背葉大山一作虛之崔嵬翼舉長
雲之縱橫左迴右旋倏陰忽明歷汗漫以天矯壯閭闔
之崢嶸簸鴻濛扇雷霆斗轉而天動山搖而海傾怒無

所搏雄無所爭固可想像其勢髣髴其形若乃足縈虹
蜺目耀日月連軒沓拖揮霍翕忽噴氣則六合生雲灑
毛則千里飛雪邈彼北荒將窮南隅運逸翰以傍擊鼓
奔飈而長驅燭龍銜光以照物列缺施鞭而啓遙塊視
三山杯觀一作看五湖其動也神應其行也道俱任公見
之而罷釣有窮不敢以彎弧莫不投竿失鏃仰之長吁
爾其雄姿壯觀塊北河漢上摩蒼蒼下覆漫漫盤古開
天而直視羲和倚日而傍歎繽紛乎八荒之間掩映乎

四海之半當胸臆之掩晝若混茫之未判忽騰覆以迴
轉則霞廓而霧散然後六月一息至于海湄歛翳景以
橫翥逆高天而下垂憩乎泱泱之野入乎汪漭之池猛
勢所射餘風所吹溟漲沸渭巖巒紛披天吳為之袂怵
海若為之躩踞巨鼇冠山而却走長鯨騰海而下馳縮
殼挫鬣莫之敢窺吾亦不測其神怪之若此蓋乃造化
之所為豈比夫蓬萊之黃鵠誇金衣與菊裳恥蒼梧之
玄鳳耀綵質與錦章既服御于靈仙久馴擾於池隍精

銜勤苦於銜木鷄鷓悲愁乎薦觴天雞警曙于蟠桃跋
烏晰耀於太陽不曠蕩而縱適何拘擊而守常未若茲
鵬之道遙無厥類乎比方不矜大而暴猛每順時而行
藏叅玄根以比壽飲元氣以充腸戲暘谷而徘徊馮炎
洲而抑揚俄而希有鳥見謂之曰偉哉鵬乎若此之樂也
吾右翼掩乎西極左翼蔽乎東荒跨躡地絡周旋天網
以恍惚為巢以虛無為場我呼爾遊爾同我翔于是乎
大鵬許之欣然相隨此二禽已登於寥廓而斥鷃之輩

空見笑於藩籬

劔閣賦

送友人王笑入蜀

咸陽之南直望五千里見雲峰之崔嵬前有劔閣橫斷
倚青天而中開上則松風蕭颯瑟颼有巴猿兮相哀旁
則飛湍走壑灑石噴閣洶湧而驚雷送佳人兮此去復
何時兮歸來望夫君兮安極我沉吟兮歎息視滄波之
東注悲白日之西匿鴻別燕兮秋聲雲愁秦而暝色若
明月出於劔閣兮與君兩鄉對酒而相憶

擬恨賦

晨登太山一望萬里松楸骨寒草宿墳毀浮生可嗟大
運同此於是僕本壯夫慷慨不歇仰思前賢飲恨而歿
昔如漢祖龍躍羣雄競奔提劍叱咤指麾中原東馳渤
澥西漂崑崙斷蛇奮怒掃清國步握瑤圖而倏昇登紫
壇而雄顧一朝長辭天下縞素若乃項王虎鬪白日爭
輝拔山力盡蓋世心微聞楚歌之四合知漢卒之重圍
帳中劍舞泣挫雄威離兮不逝喑鳴何歸至如荆卿入

秦直度易水長虹貫日寒風颯起遠警始皇擬報太子
奇謀不成憤惋而死若夫陳后失寵長門掩扉日冷金
殿霜淒錦衣春草罷綠秋螢亂飛恨桃李之委絕思君
王之有違昔者屈原既放遷於湘流心死舊楚魂飛長
楸聽江楓之嫋嫋聞嶺狖之啾啾永埋骨於淶水怨懷
王之不收及夫李斯受戮神氣黯然左右垂泣精魂動
天執愛子以長別歎黃犬之無緣或有從軍永決去國
長違天涯遷客海外思歸此人忽見愁雲蔽日目斷心

金少正
卷二十四
飛莫不攢眉痛骨
投血霑衣若乃錯繡
轂填金門烟塵
曉昏歌鐘晝誼亦
復星沉電滅閑影
潛魂已矣哉桂華
滿兮明月輝扶桑
曉兮白日飛玉顏
滅兮螻蟻聚碧臺
空兮歌舞稀與天
道兮共盡莫不委
骨而同歸

惜餘春賦

天之何為令北斗而知春兮
迴指於東方水蕩漾兮碧
色蘭歲蕤兮紅芳試登高而
望遠極雲海之微茫魂一
去兮欲斷淚流頰兮成行吟
清楓而詠滄浪懷洞庭兮

悲瀟湘何余心之縹緲兮與春風而飄揚飄揚兮思無限
念佳期兮莫展平原萋兮綺色愛芳草兮如剪惜餘
春之將闌每為恨兮不淺漢之曲兮江之潭把瑤草兮
思何堪想遊女於峴北愁帝子於湘南恨無極兮心氤
氳目眇眇兮憂紛紛披衛情於淇水結楚夢於陽雲春
每歸兮花開花已闌兮春改歎長河之流春送馳波於
東海春不留兮時已失老衰颯兮逾疾恨不得挂長繩
於青天繫此西飛之白日若有人兮情相親去南國兮

往西秦見遊絲之橫路網春輝以留人沈吟兮哀歌躑
躅兮傷別送行子之將遠看征鴻之稍滅醉愁心於垂
楊隨柔條以糾結望夫君兮咨嗟橫涕淚兮怨春華遙
寄影於明月送夫君於天涯

愁陽春賦

東風歸來見碧草而知春蕩漾惚恍何垂楊旖旎之愁
人天光青而妍和海氣綠而芳新野綵翠兮芊繇雲飄
飄而相鮮演漾兮蝨緣窺青一作新苔之生泉縹緲兮翩

絲見遊絲之縈烟魂與此兮俱斷醉一作對風光兮悽然

若乃隴水秦聲江猿巴吟明妃玉塞楚客楓林試登高

而望遠痛切骨

一作咸痛骨

而傷心春心蕩兮如波春愁亂

兮如雪兼萬情之悲歡茲一感於芳節若有一人

一作我所

思兮湘水濱隔雲霓而見無因灑別淚於尺波寄東流

於情親若使春光可攬而不滅兮吾欲贈天涯之佳人

悲清秋賦

登九疑兮望清川見三湘之潺湲水流寒以歸海雲橫

秋而蔽天余以鳥道計於故鄉兮不知去荆吳之幾千
于時西陽半規映島欲沒澄湖練明遙海上月念佳期
之浩蕩渺懷燕而望越荷花落兮江色秋風嫋嫋兮夜
悠悠臨窮溟以有羨思釣鼈於滄洲無修竿以一舉撫
洪波而增憂歸去來兮人間不可以託此吾將採藥於
蓬丘

李太白文集卷二十四

欽定四庫全書

集部

李大白文集卷

二十五至
三十

詳校官侍郎臣謝墉

檢討臣何思鈞覆勘

總校官庶吉士臣何思鈞

校對官中書臣李荃

謄錄舉人臣孫炯

欽定四庫全書

李太白文集卷二十五

唐李白撰

表

為吳王謝責赴行在遲滯表

臣某言伏蒙聖恩追赴行在臣誠惶誠恐頓首臣聞胡馬矯首嘶北風以踟顧越禽歸飛戀南枝而刷羽所以流波思其舊浦落葉墜於本根在物尚然矧於臣子臣

位叨盤石辜負明時才闕總戎謬當強寇駕拙有素天
實知之伏惟陛下重紐乾綱再清國步慙臣不逮賜臣
生全歸見白日死無遺恨然臣年過耳順風祭日加鋒
鏑殘骸劣有餘喘雖決力上道而心與願違貴貪尺寸
之程轉增犬馬之戀非有他故以疾淹留今大舉天兵
埽除戎羯所在郵驛徵發交馳臣逐便水行難於陸進
瞻望丹闕心魂若飛慙墜履之還收喜遺簪之再御不
勝涕戀屏營之至

為宋中丞請都金陵表

臣某言臣誠惶誠恐頓首頓首臣聞社稷無常奉明者
守之君臣無定位闇者失之所以父作子述重光疊輝
天未絕晉人惟戴唐以功德有厚薄運數有脩短功高
而福祚長永德薄而政教陵遲三后之姓於今為庶非
一朝也伏惟陛下欽六聖之光訓擁千載之鴻休有國
之本羣生屬望粵自明兩光岐之陽昔有周太王之興
發跡於此天啟有類豈人事歟皇朝百五十年金革不

作逆胡竊號剝亂中原雖平嵩丘填伊洛不足以掩宮
城之骸骨決洪河灑秦雍不足以蕩犬羊之羶臊毒浸
區宇憤盈穹旻此乃猛士奮劍之秋謀臣運籌之日夫
不拯橫流何以彰聖德不斬巨猾無以興神功十亂佐
周而克昌四兇及虞而乃去去元兇者非陛下而誰且
道有興廢代有中季漢當三七莽亦為災赤伏再起丕
業終光非陛下至神至聖安能勃然中興乎以臣料人
事得失敢獻疑於陛下臣猶望愚夫千慮或冀一得何

者賊臣楊國忠蔽塞天聰屠割黎庶女弟席寵傾國弄
權九土泉貨盡歸其室怨氣上激水旱荐臻重罹暴亂
百姓力屈即欲平殄螫賊恐難應期且圖萬全之計以
成一舉之策今自河以北為胡所凌自河之南孤城四
壘大盜蠶食割為洪溝宇宙峽杌昭然可覩臣伏見金
陵舊都地稱天險龍盤虎踞開局自然六代皇居五福
斯在雄圖霸跡隱軫由存咽喉控帶紫錯如繡天下衣
冠士庶避地東吳永嘉南遷未盛於此臣又聞湯及盤

庚五遷其邑典謨訓誥不以為非衛文徙居楚丘風人
流詠伏惟陛下因萬人之蕩析乘六合之壽張去扶風
萬有一危之近邦就金陵太山必安之成策苟利於物
斷在宸衷況齒革羽毛之所生榘棊豫章之所出元龜
大貝充牣其中銀坑鐵冶連緜相屬剡銅陵為金穴煮
海水為鹽山以征則兵強以守則國富橫制八極克復
兩京俗畜來蘇之歡人多徯后之望陛下西以峨嵋為
壁壘東以滄海為溝池守海陵之倉獵長洲之苑雖上

林五柞復何加焉上皇居天帝運昌之都儲精真一之
境有虞則北閉劍閣南扃瞿塘蚩尤共工五兵莫向二
聖高枕人何憂哉飛章問安往復巴峽朝發白帝暮宿
江陵首尾相應率然之舉不勝屏營瞻雲望日之至

為宋中丞自薦表

臣某聞天地閉而賢人隱雲雷屯而君子用臣伏見前
翰林供奉李白年五十有七天寶初五府交辟不求聞
達亦由子真谷口名動京師上皇聞而悅之召入禁掖

既潤色於鴻業或間草於王言雍容揄揚特見褒賞為
賤臣詐詭遂放歸山閑居製作言盈數萬屬逆胡暴亂
避地廬山遇永王東巡脅行中道奔走却至彭澤具已
陳首前後經宣慰大使崔渙及臣推覆清雪尋經奏聞
臣聞古之諸侯進賢受上賞蔽賢受明戮若三適稱美
必九錫先榮垂之典謀永以為訓臣所管李白實審無
辜懷經濟之才抗巢由之節文可以變風俗學可以究
天人一命不霑四海稱屈伏惟陛下大明廣運至道無

偏收其希世之英以為清朝之寶昔四皓遭高皇而不
起翼惠帝而方來君臣離合亦各有數豈使此人名揚
宇宙而枯槁當年傳曰舉逸人而天下歸心伏惟陛下
廻太陽之高暉流覆盆之下照特請拜一京官獻可替
否以光朝列則四海豪俊引領知歸不勝悽悽之至敢
陳薦以聞

代壽山荅孟少府移文書

淮南小壽山謹使東峯金衣雙鶴銜飛雲錦書于維揚

孟公足下曰僕包大塊之氣生洪荒之間連翼軫之分
野控荆衡之遠勢盤薄萬古邈然星河憑天霓以結峯
倚斗極而橫嶂頗能攢吸霞雨隱居靈仙產隋侯之明
珠蓄卞氏之光寶罄宇宙之美殫造化之奇方與崑崙
抗行閩風接境何人間巫廬台霍之足陳耶一昨於山
人李白處奉見吾子移文責僕以多奇叱僕以特秀而
盛談三山五嶽之美謂僕小山無名無德而稱焉觀乎
斯言何太謬之甚也吾子豈不聞乎無名為天地之始

有名為萬物之母假令登封禋祀曷足以大道譏耶然
能損人費物庖殺致祭暴殄草木鐫刻金石使載圖典
亦未足為貴乎且達人莊生常有餘論以為斥鷃不羨
於鵬鳥秋毫可並於太山由斯而談何小大之殊也又
怪於諸山藏國寶隱國賢使吾君勝道燒山披訪不獲
非通談也夫皇王登極瑞物昭至蒲萄翡翠以納貢河
圖洛書以應符設天網而掩賢窮月竈以率職天不祕
寶地不藏珍風威百蠻春養萬物王道無外何英賢珍

王而能伏匿於巖穴耶所謂榜道燒山此則王者之德未廣矣昔太公大賢傳說明德棲渭川之水藏虞虢之巖卒能形諸兆朕感乎夢想此則天道闇合豈勞乎搜訪哉果投竿詣麾捨筭作相佐周文讚武丁總而論之山亦何罪乃知巖穴為養賢之域林泉非祕寶之區則僕之諸山亦何負於國家矣近者逸人李白自峨眉而來爾其天為容道為貌不屈已不干人巢由以來一人而已乃虬蟠龜息遁乎此山僕嘗弄之以綠綺卧之以

碧雲嗽之以瓊液餌之以金沙既而童顏益春真氣愈
茂將欲倚劍天外挂弓扶桑浮四海橫八荒出宇宙之
寥廓登雲天之眇茫俄而李公仰天長吁謂其友人曰
吾未可去也吾與爾達則兼濟天下窮則獨善一身安
能飡君紫霞蔭君青松乘君鸞鶴駕君蚪龍一朝飛騰
為方丈蓬萊之人耳此則未可也乃相與卷其丹書匣
其瑤瑟申管晏之談謀帝王之術奮其智能願為輔弼
使寰區大定海縣清一事君之道成榮親之義畢然後

與陶朱留侯浮五湖戲滄洲不足為難矣即僕林下之
所隱容豈不大哉必能資其聰明輔以正氣借之以物
色發之以文章雖煙花中貧沒齒無恨其有山精木魅
雄虺猛獸以驅之四荒磔裂原野使影跡絕滅不干戶
庭亦遣清風掃門明月侍坐此乃養賢之心實亦勤矣
孟子孟子無見深責耶明年青春求我於此巖也

上安州李長史書

白嶽崎歷落可笑人也雖然頗嘗覽千載觀百家至於

聖賢相似厥衆則有若似於仲尼紀信似於高祖牢之
似於無忌宋玉似於屈原而遙觀君侯竊疑魏洽便欲
趨就臨然舉鞭遲疑之間未及迴避且理有疑誤而成
過事有形似而類真惟大雅含弘方能恕之也白少頗
周慎忝聞義方入暗室而無欺屬於昏行而不變今小人
履疑誤形似之迹君侯流愷悌矜捨之恩戢秋霜之威
布冬日之愛眸容有穆怒顏不彰雖將軍息恨於長孫

孺

一作

之前此無慙德司空受揖於元淑之際彼未為賢

一言見寃九死非謝白孤劍誰託悲歌自憐迫於恓惶
席不暇暖寄絕國而何仰若浮雲而無依南徙莫從北
遊失路言客汝海近還邛城昨遇故人飲以狂藥一酌
一笑陶然樂酣困河朔之清觴飫中山之醇酎屬早日
初眩晨霾未收乏離朱之明昧王戎之視青白其眼瞢
而前行亦何異抗莊公之輪怒螭螂之臂御者趨召明
其是非入門鞠躬精魄飛散昔徐邈緣醉而賞魏王却
以為賢無鹽因醜而獲齊君待之逾厚白妄人也安能

比之上挂國風相鼠之譏下懷周易履虎之懼慙以固
陋禮而遣之幸容甯越之辜深荷王公之德銘刻心骨
退思狂慙五情冰炭罔知所措晝愧於影夜慙於魄啟
處不惶戰跼無地伏惟君侯明奪秋月和均韶風掃塵
辭場振發文雅陸機作太康之傑士未可比肩曹植為
建武之雄才惟堪捧駕天下豪俊翕然趨風白之不敏
竊慕餘論何圖叔夜潦倒不切於事情正平猖狂自貽
於恥辱一忤容色終身厚顏敢沐芳負荆請罪門下儻

免以訓責恤其愚蒙如能伏劍結纓謝君侯之德敢一
夜力撰春遊救苦寺詩一首十韻石巖寺詩一首八韻
上楊都尉詩一首三十韻辭旨狂野貴露下情輕干視
聽幸乞詳覽

與賈少公書

宿昔惟清勝白繇疾疲茶去期恬退才微識淺無足濟
時雖中原橫潰將何以救之王命崇重大總元戎辟書
三至人輕禮重嚴期迫切難以固辭扶力一行前觀進

退且殷源廬嶽十載時人觀其起與不起以卜江左興
亡謝安高卧東山蒼生屬望白不樹矯抗之跡恥振玄
邈之風混遊漁商隱不絕俗豈徒販賣雲壑要射虛名
方之二子實有慙德徒塵忝幕府終無能為唯當報國
薦賢持以自免斯言若謬天實殛之以足下深知具申
中款惠子知我夫何間然勾當小事但增悚惕

為趙宣城與楊右相書

某啟辭違積年伏戀軒屏首冬初寒伏惟相公尊體起

居萬福某蒙恩才朽齒邁徒延聖日少忝未吏本乏遠
圖中年廢缺分歸園壑昔相公秉國憲之日一拔九霄
拂刷前恥昇騰晚官恩貸稠疊實戴丘山落羽再振枯
鱗旋躍運以大風之舉假以磨天之翔衣繡霜臺舍香
華省宰劇慙強項之名酌貪礪清心之節三典列郡寂
無成功但宣布王澤式酬天獎伏惟相公開張徽猷寅
亮天地入夔龍之室持造化之權安石高枕蒼生是仰
某鳴躍無已剪拂因人銀章朱紱坐榮官達身荷宸睟

目識龍顏既齊飛於鵷鷺復寄跡於門館皆相公大造之力也而鐘鳴漏盡夜行不息止足之分實媿古人犬馬戀主迫於西汜所冀枯松晚歲無改節於風霜老驥餘年期盡力於蹄足上答明主下報相公悽悽之誠屏息於此伏惟相公收遺簪於少昊念亡弓於楚澤哀當益壯結草知歸瞻望恩光無忘景刻

與韓荊州書

白聞天下談士相聚而言曰生不用萬戶侯但願一識

韓荊州何令人之景慕一至於此耶豈不以有周公之風躬吐握之事使海內豪俊奔走而歸之一登龍門則聲譽十倍所以龍盤鳳逸之士皆欲收名定價於君侯願君侯不以富貴而驕之寒賤而忽之則三千賓中有毛遂使白得穎脫而出即其人焉白隴西布衣流落楚漢十五好劍術徧干諸侯三十成文章歷抵鄉相雖長不滿七尺而心雄萬夫王公大臣許與氣義此疇曩心跡安敢不盡於君侯為君侯制作侔神明德行動天地

筆參於造化學究於天人幸願開張心顏不以長揖見
拒必若接之以高宴縱之以清談請日試萬言倚馬可
待今天下以君侯為文章之司命人物之權衡一經品
題便作佳士而君侯何惜階前盈尺之地不使白揚眉
吐氣激昂青雲耶昔王子師為豫章未下車即辟荀慈
明既下車又辟孔文舉山濤作冀州甄拔三十餘人或
為侍中尚書先代所美而君侯亦薦一嚴協律人為祕
書郎中間崔宗之房習祖黎昕許瑩之徒或以才名見

知或以清白見賞白每觀其銜恩撫躬忠義奮發白以此感激知君侯推赤心於諸賢腹中所以不歸他人而願委身國士儻急難有用敢効微軀且人非堯舜誰能盡善白謨猷籌畫安能自矜至於制作積成卷軸則欲塵穢視聽恐雕蟲小伎不合大人若賜觀芻蕘請給以紙墨兼人書之然後退歸閑軒繕寫呈上庶青萍結綠長價於薛卞之門幸惟下流大開獎飾惟君侯圖之

上安州裴長史書

白聞天不言而四時行地不語而百物生白人焉非天地也安得不言而知乎敢剖心析肝論舉身之事便當談笑以明其心而粗陳其大綱一快憤懣惟君侯察焉白本家金陵世為右姓遭沮渠蒙遜難奔流咸秦因官寓家少長江漢五歲誦六甲十歲觀百家軒轅以來頗得聞矣常橫經籍詩書制作不倦迄于今三十春矣以為士生則桑弧蓬矢射乎四方故知大丈夫必有四方之志乃仗劍去國辭親遠遊南窮蒼梧東涉溟海見鄉人

相如大誇雲夢之事云楚有七澤遂來觀焉而許相公
家見招妻以孫女便憩于此至移三霜焉曩昔東遊維
揚不逾一年散金三十餘萬有落魄公子悉皆濟之此
則是白之輕財好施也又昔與蜀中友人吳指南同遊
於楚指南死於洞庭之上白禫服慟哭若喪天倫炎月
伏屍泣盡而繼之以血行路聞者悉皆傷心猛虎前臨
堅守不動遂權殯於湖側便之金陵數年來觀筋骨尚
在白雪泣持刃躬申洗削裹骨徒步負之而趨寢興攜

持無輟身手遂丐貸營葬於鄂城之東故鄉路遙魂魄
無主禮以遷窆式昭朋情此則是白存交重義也又昔
與逸人東巖子隱於岷山之陽白巢居數年不跡城市
養奇禽千計呼皆就掌取食了無驚猜廣漢太守聞而
異之詣廬親覩因舉二人以有道並不起此則白養高
志機不屈之跡也又前禮部尚書蘇公出為益州長史
白於路中投刺待以布衣之禮因謂羣寮曰此子天才
英麗下筆不休雖風力未成且見專車之骨若廣之以

學可以相如比肩也四海明識具知此談前此郡督馬公朝野豪彥一見盡禮許為奇才因謂長史李京之曰諸人之文猶山無煙霞春無草樹李白之文清雄奔放名章俊語絡繹間起光明洞澈句句動人此則故交元丹親接斯議若蘇馬二公愚人也復何足盡陳儻賢賢也白有可尚夫唐虞之際於斯為盛有婦人焉九人而已是知才難不可多得白野人也頗工於文惟君侯顧之無按劍也伏惟君侯貴而且賢鷹揚虎視齒若編貝膚

如凝脂昭昭乎若玉山上行朗然映人也而高義重諾
名飛天京四方諸侯聞風暗許倚劍慷慨氣干虹蜺月
費千金日宴羣客出躍駿馬入羅紅顏所在之處賓朋
成市故時人歌曰賓朋何喧喧日夜裴公門願得裴公
之一言不須驅馬將華軒白不知君侯何以得此聲於
天壤之間豈不由重諾好賢謙以得也而晚節改操棲
情翰林天才超然度越作者屈佐邛國時惟清哉稜威
雄雄下燭羣物白竊慕高義已經十年雲山間之造謁

無路今也運會得趨末塵承顏接辭八九度矣常欲一
雪心跡崎嶇未便何圖謗詈忽生衆口攢毀將欲投杼
下客震於嚴威然自明無辜何憂悔吝孔子曰畏天命
畏大人畏聖人之言過此三者鬼神不害若使事得其
實罪當其身則將浴蘭沐芳自屏於烹鮮之地惟君侯
死生不然投山竄海轉死溝壑豈能明目張膽託書自
陳耶昔王東海問犯夜者曰何所從來答曰從師受學
不覺日晚王曰吾豈可鞭撻寧越以立威名想君侯通

人必不爾也願君侯惠以大遇洞開心顏終乎前恩再
辱英眇白必能使精誠動天長虹貫日直度易水不以
為寒若赫然作威加以大怒不許門下逐之長途白即
膝行於前再拜而去西入秦海一觀國風永辭君侯黃
鵠舉矣何王公大人之門不可以彈長劍乎

李太白文集卷二十五